



Bosnia and Herzegovina  
Federation of Bosnia and Herzegovina

**CANTON SARAJEVO**  
**Cantonal Civil Protection Administration**

Broj: 01-04-877/20  
Sarajevo, 07.05.2020. godine

**SKUPŠTINA KANTONA SARAJEVO**  
**- OVDJE -**

**PREDMET:** Informacija o nabavci zaštitnih maski od firme „Panta Rei“ d.o.o. Sarajevo, dostavlja se.-

Poštovani,

Vežano za Vaš zahtjev za dostavljanje informacije o nabavci zaštitnih maski od firme „Panta Rei“ d.o.o. Sarajevo, dostavljamo Vam istu kako slijedi:

Vlada Kantona Sarajevo je dana 18.03.2020. godine donijela Odluku o proglašenju stanja prirodne i druge nesreće zbog opasnosti od širenja zarazne bolesti uzrokovane koronavirusom (COVID-19) na području Kantona Sarajevo, broj: 02-04-7986-1.1/20.

Nakon proglašenja stanja prirodne i dr. nesreće od strane Vlade Kantona Sarajevo, uslijedilo je aktiviranje Štaba civilne zaštite Kantona Sarajevo (u daljnjem tekstu: Štab), koji djeluje u skladu sa svojim nadležnostima propisanim Zakonom o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, br. 39/03, 22/06 i 43/10 – u daljnjem tekstu: Zakon o zaštiti i spašavanju), Zakonom o nadležnostima organa vlasti Kantona Sarajevo u oblasti zaštite i spašavanja ljudi i materijalnih dobara od prirodnih i drugih nesreća („Službene novine Kantona Sarajevo“, br. 39/08, 19/11 i 45/15), Pravilnikom o načinu rada i funkcioniranju štabova i povjerenika civilne zaštite („Službene novine Federacije BiH“, br. 77/06, 5/07 i 32/14), Uredbom o osnivanju Štaba civilne zaštite Kantona Sarajevo („Službene novine Kantona Sarajevo“, br 24/13, 7/16 i 27/19) i Odlukom o uslovima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća („Službene novine Federacije BiH“, br. 4/12, 80/13 i 20/20).

Što se tiče predmetne nabavke, ističemo da je Štab na svojoj 3. vanrednoj sjednici održanoj 19. marta 2020. godine, između ostalog, razmatrao i nabavku zaštitnih maski, te je u skladu sa svojim ovlaštenjima donio Odluku, broj: 08-40-503-2/20, koja se nalazi u prilogu. Navedenom Odlukom Štab je odobrio Kantonalnoj upravi civilne zaštite Kantona Sarajevo izdvajanje finansijskih sredstava u iznosu od 52.650,00 KM za nabavku 50.000 komada zaštitnih maski.

Nadalje, na osnovu navedene Odluke Štaba, Kantonalna uprava civilne zaštite Kantona Sarajevo je 20. marta 2020. godine donijela Odluku, broj: 06-11-522-1/20, kojom se od primjene



Zakona o javnim nabavkama izuzima nabavka zaštitnih maski, te je na osnovu podataka i informacija prikupljenih u prethodnom periodu ispitivanjem tržišta, odabrala ponuđača „Panta Rei d.o.o. Sarajevo“, koji je ponudio najnižu cijenu, najkraći rok isporuke i najpovoljniji način plaćanja (50% avansno po obostranom potpisivanju ugovora, a ostatak 10 dana nakon cjelokupne isporuke zaštitnih maski) i sa istim zaključila Ugovor o predmetnoj nabavci dana 20.03.2020. godine.

Kantonalna uprava civilne zaštite Kantona Sarajevo je kontaktirala više ponuđača, za koje je imala saznanja da se bave prodajom zaštitnih maski. Međutim, većina kontaktiranih ponuđača nije imala na stanju zaštitne maske za prodaju, a oni koji su imali iste na stanju zahtijevali su avansnu uplatu. Naime, ponuđači su se pravdali sa obrazloženjem da je avansna uplata neophodna zbog uplate određenog iznosa proizvođačima maski za nabavku sirovine. Na navedenoj sjednici Štaba civilne zaštite Kantona Sarajevo su predočene neke od tih ponuda i na istoj su ponuđači kontaktirani. Primjera radi, navodimo ponudu firme „Bosnalijek“ d.o.o. Sarajevo, koja je ponudila cijenu zaštitnih maski u visini od 1,17 KM sa PDV-om po komadu, čiju ponudu Vam dostavljamo u prilogu. Međutim, firma „Bosnalijek“ d.o.o. Sarajevo nije mogla u kratkom roku isporučiti tražene zaštitne maske. Firma „Panta Rei“ d.o.o Sarajevo je ponudila zaštitne maske po cijeni 1,053 KM sa PDV-om po komadu, a što je vidljivo iz predračuna, broj: 228/2020, koji Vam također dostavljamo u prilogu. Ističemo da su telefonskim putem kontaktirani i drugi ponuđači, koji također nisu bili u mogućnosti da u kratkom roku isporuče jednokratne zaštitne maske, a cijene ponuda zaštitnih jednokratnih maski su bile veće od ponude odabranog ponuđača.

Predmetna nabavka je provedena putem izuzeća od primjene Zakona o javnim nabavkama, u skladu sa članom 10 stav 1) tačka b) Zakona o javnim nabavkama („Službeni glasnik BiH“, broj: 39/14 – u daljem tekstu: Zakon), iz razloga krajnje hitnosti, zbog neophodnosti nabavke istih. Naime, Kantonalna uprava civilne zaštite Kantona Sarajevo nije imala na stanju jednokratnih zaštitnih maski kada je proglašeno stanje prirodne i dr. nesreće. Navedene jednokratne zaštitne maske - troslojne su nabavljene, kako bi se spriječilo širenje pandemije, u svrhu zaštite života i zdravlja ljudi, te su u tu svrhu i podijeljene socijalnim i zdravstvenim ustanovama, odnosno onima kojim su iste bile neophodne za obavljanje poslova u periodu proglašenog stanja prirodne i dr. nesreće.

Na kraju dodajemo, da je Kantonalna uprava civilne zaštite Kantona Sarajevo u skladu sa članom 4. Ugovora o predmetnoj nabavci dana, 24.03.2020. godine poslala Ministarstvu finansija Kantona Sarajevo nalog za plaćanje avansnog dijela (50% od ukupne cijena iz ugovora) u iznosu od 26.325,00 KM, dok je nakon cjelokupne isporuke 50.000 zaštitnih maski dana 27.04.2020. godine poslala navedenom ministarstvu nalog za plaćanje preostalog dijela u iznosu od 26.325,00 KM. Prema informacijama sa kojim raspolaže Kantonalna uprava civilne zaštite Kantona Sarajevo, na dan sačinjavanja ove informacije, Ministarstvo finansija Kantona Sarajevo je isplatilo avansni dio u iznosu od 26.325,00 KM pravnom licu „Panta Rei d.o.o. Sarajevo“, dok mu preostali dio još uvijek nije isplaćen, iako je nalog poslan Ministarstvu finansija Kantona Sarajevo odmah nakon cjelokupne isporuke. Napominjemo da Kantonalna uprava civilne zaštite Kantona Sarajevo vrši sva plaćanja putem Trezora.

U vezi sa svim gore navedenim, ističemo da je Agencija za javne nabavke BiH dana 17.03.2020. izdala Saopštenje, broj: 02-02-1-489-1/20, u kojem navodi, između ostalog, da u situacijama krajnje hitnosti, kada je potrebno reagovati istog momenta, npr. u roku od 1 ili 2 sata, ili čak u roku od nekoliko minuta, odnosno kada objektivno nije moguće primijeniti ni pregovarački postupak bez objavljivanja obavještenja o nabavci, tada se nabavka može podvesti pod izuzeće od primjene Zakona sa aspekta „posebnih mjera sigurnosti“ iz člana 10. stav (1) tačka b) Zakona. U slučaju izuzetne nužde (npr. spašavanje ljudskih života, zdravlja, i sl.) i kada objektivno nije moguće primijeniti ni pregovarački postupak bez objavljivanja obavještenja o nabavci, opravdano je




primijeniti izuzeće od primjene Zakona, oslanjajući se na javni interes (npr. Zakoni o zaštiti stanovništva od zaraznih bolesti u BiH, Zakoni o zaštiti i spašavanju ljudi i materijalnih dobara u BiH od prirodnih i drugih nesreća, i sl.). Bitno je obrazložiti da bi primjena postupaka javne nabavke, odnosno vrijeme potrebno za provođenje istih, prouzrokovalo izuzetno negativne posljedice, te da su ugovorni organi upravo na temelju takve procjene postupili i preduzeli radnje odmah. Navedeno Saopštenje Vam dostavljamo u prilogu akta.

Shodno tome, Kantonalna uprava civilne zaštite Kantona Sarajevo je u predmetnom postupku javne nabavke primjenila izuzeće od primjene Zakona o javnim nabavkama BiH, oslanjajući se na Odluku o proglašenju stanja prirodne i dr. nesreće, javni interes i pozivajući se na Zakon o zaštiti i spašavanju, što je vidljivo iz Odluke o pokretanju postupka javne nabavke, broj: 06-11-522-1/20 od 20.03.2020. godine, koju Vam dostavljamo u prilogu, te je predmetni postupak iz razloga krajnje hitnosti proveden odmah, jer je bilo neophodno reagovati istog momenta.

S poštovanjem,

**Prilog:** - Kao u tekstu.

Informaciju pripremio: Kemal Cacan,   
vršilac dužnosti direktora KUCZ KS  
u vrijeme potpisivanja Ugovora sa  
ponuđačem „Panta Rei“ d.o.o. Sarajevo

**Dostavljeno:**

- Naslovu
- a/a





Bosnia and Herzegovina  
Federation of Bosnia and Herzegovina

CANTON SARAJEVO  
Headquarters of civil protection

Broj: 08-40-503-2/20  
Sarajevo, 19.03.2020. godine

Na osnovu člana 29. tačka 1) Pravilnika o načinu rada i funkcioniranju štabova i povjerenika civilne zaštite („Službene novine Federacije BiH“, br. 77/06, 5/07 i 32/14), člana 17. Poslovnika o radu Štaba civilne zaštite Kantona Sarajevo, broj: 22-08-44-411/18 od 27.02.2018. godine i broj: 22-08-44-422.1/18 od 20.02.2019. godine, a u vezi tačke VI stav 1. Odluke o uslovima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća („Službene novine Federacije BiH“, br. 4/12, 80/13 i 20/20), Štab civilne zaštite Kantona Sarajevo, na 3. vanrednoj sjednici održanoj, 19.03.2020. godine, *donosi*

## ODLUKU

### I

Odobrava se Kantonalnoj upravi civilne zaštite Kantona Sarajevo (u daljnjem tekstu: Uprava) izdvajanje finansijskih sredstava u iznosu do 52.650 KM sa PDV-om (slovima: pedesetdvijehiljadešeststotinapedeset KM), za nabavku 50.000 komada troslojnih maski. Izdvajanje sredstava odnosi se na finansiranje hitnih mjera zaštite i spašavanja koje se moraju provoditi na spašavanju ugroženih ljudi i materijalnih dobara u toku djelovanja prirodne i druge nesreće, kao što su provedba evakuacije, prihvatanje i zbrinjavanje ugroženog stanovništva i imovine, osiguranje prometa i drugih mjera za zaštitu i spašavanje, te sprečavanje širenja opasnosti od nepogoda i njihovih posljedica.

### II

Sredstva iz tačke I ove Odluke se osiguravaju iz Budžeta Uprave za 2020. godinu, ekonomski kod 613400, subanalitika UAF001 – Nabavka materijala – namjenska sredstva.

### III

Za realizaciju ove Odluke zadužuje se Uprava i Ministarstvo finansija Kantona Sarajevo.

### IV

Ovo Odluka stupa na snagu danom donošenja.

**KOMANDANT**

*Nijada Glamoc*





## OBRAZLOŽENJE

### I – PRAVNI OSNOV

Pravni osnov za donošenje ove Odluke sadržan je u tački VI Odluke o uslovima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća („Službene novine Federacije BiH“, br. 4/12 i 80/13), te u članu 29. tačka 1) Pravilnika o načinu rada i funkcioniranju štabova i povjerenika civilne zaštite („Službene novine Federacije BiH“, br. 77/06, 5/07 i 32/14) i članu 17. Poslovnika o radu Štaba civilne zaštite Kantona Sarajevo, broj: 22-08-44-411/18 od 27.02.2018. godine i broj: 22-08-44-422.1/18 od 20.02.2019. godine.

### II – RAZLOZI ZA DONOŠENJE ODLUKE

Štab civilne zaštite Kantona Sarajevo (u daljnjem tekstu: Štab) je dana, 18.03.2020. godine u 08:00 sati održao 1. vanrednu sjednicu na kojoj je razmatrao trenutno stanja na području Kantona Sarajevo uzrokovano koronavirusom (COVID-19), te na osnovu informacija prikupljenih s cjelokupnog područja Kantona Sarajevo, a uvažavajući činjenicu, da je Vlada Federacije BiH na prijedlog Federalnog štaba civilne zaštite dana, 16.03.2020. godine donijela Odluku o proglašenju stanja nesreće uzrokovano koronavirusom (COVID-19) na području Federacije BiH, procijenio je da su stvoreni uslovi da se na području Kantona Sarajevo, proglasi stanje prirodne i druge nesreće i shodno tome predložio Vladi Kantona da donese Odluku o proglašenju stanja nesreće zbog opasnosti od širenja zarazne bolesti uzrokovane koronavirusom (COVID – 19) na području Kantona Sarajevo.

Vlada Kantona Sarajevo je prihvatila prijedlog Štaba i donijela Odluku o proglašenju stanja prirodne i druge nesreće zbog opasnosti od širenja zarazne bolesti uzrokovane koronavirusom (COVID – 19) na području Kantona Sarajevo, koja Vam je prosljeđena putem našeg Kantonalnog operativnog centra civilne zaštite.

Shodno navedenom, stvoreni su uslovi za korištenje sredstava posebne naknade u skladu sa tačkom VI stav 1. Odluke o uslovima i načinu korištenja sredstava posebne naknade za zaštitu od prirodnih i drugih nesreća.

### III – OBRAZLOŽENJE PRAVNIH RJEŠENJA

Tačkom I ove odluke određeno je da Štab civilne zaštite Kantona Sarajevo odobrava izdvajanje finansijskih sredstava u iznosu do 52.650 KM sa PDV-om Upravi, za nabavku 50.000 komada troslojnih maski u skladu sa tačkom VI stav 1. Odluke o uslovima i načinu korištenja sredstava posebne naknade za zaštitu od prirodnih i drugih nesreća.

Tačkom II ove Odluke definiše se izvor finansijskih sredstava.

Tačkom III ove Odluke određeni su organi koji su zaduženi za njenu realizaciju.

Tačkom IV ove Odluke određen je datum stupanja na snagu Odluke.

### IV- FINANSIJSKA SREDSTVA

Realizacija ove Odluke izvršit će se iz Budžeta Kantona Sarajevo za 2020. godinu, sa pozicije 613400, subanalitika UAF001 – Nabavka materijala – namjenska sredstva.



**Amela Muslić**

Menadžer ključnih klijenata BiH / BiH Key Account Manager  
Sektor Regija jugoistočna Evropa / SEE Region Department

**T:** +387 61 182 751 | **F:** +387 33 814 268

**Bosnalijek d.d.**

Jukićeva 53, 71000 Sarajevo  
Bosnia and Herzegovina



Think before you ink. Please print this mail only if necessary

---

**From :** Anes Zubović <anes.zubovic@kucz.ks.gov.ba> Wed, 18 Mar, 2020 15:39

**Subject :** Re: Upit

**To :** adnan besovic <adnan.besovic@edu720.com>

Poštovani Adnane,

Hvala Vam na ponudi...javim se uskoro

L.p.

---

**From:** "adnan besovic" <adnan.besovic@edu720.com>

**To:** "Anes Zubović" <anes.zubovic@kucz.ks.gov.ba>

**Sent:** Wednesday, 18 March, 2020 15:31:37

**Subject:** Re: Upit

---

**From :** Adnan Besovic <adnan.besovic@edu720.com> Wed, 18 Mar, 2020 15:31

**Subject :** Re: Upit  4 attachments

**To :** Anes Zubović <anes.zubovic@kucz.ks.gov.ba>

Poštovani Anese,

Od specifikacije potreba koje imate, ja Vam idvajam slijedece :

Hirurske maske jednokratne troslojne 1,17 KM ( u cijenu je uracunat PDV, bez PDV-a 1,00 KM ) minimalna kolicina 10 000 komada, to Vam mogu obezbijediti za 4 do 5 dana

Jednokratna odijela cijena je 7,80 KM po odijelu cijena je bez PDV-a a rok isporuke bi bilo tek za 10 dana, jer proizvodjac cekta materijal.

I maske i odijela se rade u BiH.

# „Panta Rei“ d.o.o. Sarajevo

Šibenska br. 3, 71 000 Sarajevo, Bosna i Hercegovina

Tel: +38733848882

Mob: +38765454586

Datum predračuna: 20.03.2020.

Kupac: Civilna zaštita KANTONA SARAJEVO

PRN – Predračun broj 228/2020

Šifra	Naziv	MJ	količina	Cijena	R %	PDV %	Vrijednost
9111	Pamučna maska	kom	1,00	1,60	0,00	17,00	1,60
9112	Troslojne maske	kom	50.000,00	0,90	0,00	17,00	45.000,00

UKUPNO: 45.000,00

PDV: 7.650,00

Ukupno za naplatu BAM: 52.650,00

Napomena: U cijenu je uključen transport do skladišta kupca.

Način plaćanja: 100% avans

ID broj: 4202188860008

Broj računa: 1401051120051271 Sberbank BH d.d



BOSNIA AND HERZEGOVINA  
PUBLIC PROCUREMENT AGENCY

Broj: 02-02-1-489-1/20  
Sarajevo, 17.03.2020. godine

**VRLO HITNO !**

Povodom aktuelnih dešavanja u Bosni i Hercegovini u vezi sa Corona virusom (COVID-19) i nabavki neophodnih za sprječavanje širenja i ublažavanje posljedica istog, te u vezi sa službenim proglašenjem pandemije od strane Svjetske zdravstvene organizacije od 11.03.2020. godine, Agencija za javne nabavke Bosne i Hercegovine u okviru svojih nadležnosti definisanih Zakonom o javnim nabavkama („Službeni glasnik BiH“, broj 39/14) - u daljem tekstu: Zakon, daje slijedeće

### SAOPŠTENJE

- 1) U situaciji krajnje hitnosti, kada nije moguće primjeniti redovne postupke javne nabavke, ali ipak postoji dovoljno vremena, može se koristiti pregovarački postupak bez objavljivanja obavještenja o nabavci pod uslovima navedenim u članu 21. stav (1) tačka d) Zakona.**

Navedena odredba Zakona tretira situaciju kada je potrebna brza aktivnost ugovornog organa u vezi s nabavkom prouzrokovanom nepredvidivim događajima.

Naime, ugovorni organi mogu, izuzetno ugovore dodjeljivati putem pregovaračkog postupka bez objavljivanja obavještenja o nabavci, kada se zbog dokazivih razloga krajnje hitnosti, prouzrokovane događajima nepredvidivim za dati ugovorni organ, ne mogu ispoštovati minimalni rokovi koji su utvđeni za redovne postupke. Okolnosti kojima se opravdava izuzetna hitnost ne smiju se ni u kom slučaju moći dovesti u vezu sa ugovornim organom. Znači, prvi uslov za primjenu ovog postupka jeste da ugovorni organ mora ponuditi jasne i objektivne dokaze za hitno djelovanje potkrijepljene argumentima koje može uvjerljivo dokazati javnosti ili institucijama nadležnim za kontrolu postupaka javnih nabavki. Drugi uslov je da okolnosti krajnje hitnosti trebaju biti izazvane događajima koje ugovorni organ nije mogao predvidjeti (viša sila). Treće, nastanak takvih okolnosti mora poticati izvan kontrole ugovornog organa te se traži naročito brza aktivnost ugovornog organa što se tiče nabavke koja djeluje u pravcu spriječavanja, ublažavanja i prestanka štetnog djelovanja.

Dakle, dozvoljena je primjena pregovaračkog postupka bez objavljivanja obavještenja o nabavci ukoliko su kumulativno ispunjeni slijedeći uslovi:

- a) Postojanje događaja koji se nije mogao predvidjeti,
- b) Krajnja hitnost zbog koje je nemoguće ispuniti rokove predviđene za druge, redovne postupke javne nabavke,
- c) Slučajna veza između nepredvidivog događaja i krajnje hitnosti koja iz njega proizlazi.

Pregovarački postupak iz razloga krajnje hitnosti provodi se sa jednim ponuđačem u skladu sa članom 28. stav (1) Zakona, te se ugovor sa istim može zaključiti odmah po donošenju odluke o izboru jer nije potrebno čekati protok roka 15 dana od dana kada su ponuđači obaviješteni o izboru najpovoljnijeg ponuđača, a u skladu sa članom 98. stav (2) tačka a) Zakona.



- 2) U situacijama krajnje hitnosti, kada je potrebno reagovati istog momenta, npr. u roku od 1 ili 2 sata, ili čak u roku od nekoliko minuta, odnosno kada objektivno nije moguće primijeniti ni pregovarački postupak bez objavljivanja obavještenja o nabavci, tada se nabavka može podvesti pod izuzeće od primjene Zakona sa aspekta „posebnih mjera sigurnosti“ iz člana 10. stav (1) tačka b) Zakona.

U slučaju izuzetne nužde (npr. spašavanje ljudskih života, zdravlja, i sl.) i kada objektivno nije moguće primijeniti ni pregovarački postupak bez objavljivanja obavještenja o nabavci, opravdano je primijeniti izuzeće od primjene Zakona, oslanjajući se na javni interes (npr. Zakoni o zaštiti stanovništva od zaraznih bolesti u BiH, Zakoni o zaštiti i spašavanju ljudi i materijalnih dobara u BiH od prirodnih i drugih nesreća, i sl.). Bitno je obrazložiti da bi primjena postupaka javne nabavke, odnosno vrijeme potrebno za provođenje istih, prouzrokovalo izuzetno negativne posljedice, te da su ugovorni organi upravo na temelju takve procjene postupili i preduzeli radnje odmah.

## GENERALNE NAPOMENE

Primjena pregovaračkog postupka bez objavljivanja obavještenja o nabavci za hitne nabavke kada je ovaj postupak vremenski moguće provesti i pozivanje na izuzeće od primjene Zakona kada nije moguće provesti niti jedan postupak u skladu sa naprijed navedenim, opravdana je samo ukoliko se nabavka ne odugovlači i može se odnositi samo na one nabavke koje su neophodne da bi se spasili ljudski životi, spriječila ili ublažila epidemija ili materijalna šteta, te se shodno tome ne mogu primijeniti na redovne nabavke, odnosno na nabavke koje zaista nisu neophodne.

Naglašavamo da su i u navedenim slučajevima ugovorni organi dužni da poštuju sve odredbe Zakona i pratećih podzakonskih akata (npr. opći principi, plan javnih nabavki ili posebna odluka, odluka o pokretanju postupka javne nabavke ili odluka o izuzeću, objava informacije na web stranici ugovornog organa o vođenju pregovaračkog postupka bez objave obavještenja o nabavci, objava obavještenja o dodjelu ugovora putem pregovaračkog postupka bez objave obavještenja o nabavci, dostava izvještaja o izuzeću od primjene Zakona, objava osnovnih elemenata ugovora i izmjena ugovora na web stranici ugovornog organa, i dr.).

Također skrećemo pažnju ponuđačima da se ponašaju u skladu sa tržišnim okolnostima i da ne zloupotrebjavaju navedenu situaciju jer će u tom slučaju biti obaviješteni nadležni organi.





Bosnia and Herzegovina  
Federation of Bosnia and Herzegovina

**CANTON SARAJEVO**  
**Cantonal Civil Protection Administration**

Broj: 06-11-522-1/20

Datum: 20.03.2020.godine

Na osnovu člana 70. stav 2. Zakona o organizaciji organa uprave u FBiH ("Službene novine Federacije BiH" br.: 35/05), a u vezi člana 10. stav 1. tačka b), člana 18. stav 2), Zakona o javnim nabavkama ("Službeni glasnik Bosne i Hercegovine", broj 39/14) VD Direktor Kantonalne uprave civilne zaštite Kantona Sarajevo, *donosi*

**ODLUKU**

**o pokretanju postupka za izuzeće od primjene Zakona o javnim nabavkama**

**I**

Od primjene Zakona o javnim nabavkama BiH izuzimaju se nabavke roba "Zaštitna maska - jednokratna", oznaka iz JRJN: 18143000-3. Količina maski koja se nabavlja je 50.000 komada, a procjenjena vrijednost nabavke je do 50.000,00 KM (slovima: pedesethiljada KM) bez PDV-a.

**II**

Sredstva za nabavku iz tačke I ove odluke se osiguravaju iz planiranih namjenskih sredstava Kantonalne uprave civilne zaštite Kantona Sarajevo za 2020. godinu sa ekonomskog koda: 613400 UAF001 – Nabavka materijala.

**III**

Ova Odluka stupa na snagu danom donošenja i bit će objavljena na službenoj stranici Kantonalne uprave civilne zaštite Kantona Sarajevo.

**Obrazloženje**

Krizni štab Ministarstva zdravstva Kantona Sarajevo zbog praćenja situacije i poduzimanja mjera radi sprečavanja i ranog otkrivanja bolesti izazvane novim korona virusom (Covid-19) koji je proglašen zaraznom bolešću i čije je sprečavanje i suzbijanje od interesa za Federaciju BiH, održao je sjednicu 10.03.2020. godine i donio naredbu kojom se preciznije definira i nalaže postupanje javnih subjekata i pojedinaca u trenutnim okolnostima. U ovoj naredbi su između ostalog sadržane i preporuke za postupanje građana izdate od strane Službe za epidemiologiju Federacije BiH, a sve u cilju prevencije.

Na osnovu Zakona o zaštiti spašavanja ljudi i materijalnih dobara od prirodnih i drugih nesreća i odluke Vlade FBiH od 16. marta Federalni štab civilne zaštite donio je niz naredbi kojim će se pokušati suzbiti širenje koronavirusa na području FBiH.



Kantonalna uprava civilne zaštite Kantona Sarajevo ima 217 zaposlenika i veliki broj objekata u kojima isti obavljaju svoje radne zadatke. Veliki broj uposlenika (vatrogasci) ugovornog organa obavlja poslove iz osnovne djelatnosti i izvan objekata Kantonalne uprave civilne zaštite Kantona Sarajevo, s obzirom da je zaštita od požara u nadležnosti ovog organa uprave.

Također, Kantonalna uprava civilne zaštite Kantona Sarajevo, u skladu sa Uredbom o organizovanju službi zaštite i spašavanja i jedinica specijalizovane namjene Kantona Sarajevo ("Službene novine Kantona Sarajevo" 30/13 i 29/19) oprema sljedeće službe:

- a) Služba za radiološku zaštitu formira se u laboratoriji za analizu radioaktivnosti u Veterinarskom fakultetu Sarajevo, odsjek za radiologiju i atomsku hemiju,
- b) Služba za epidemiologiju, mikrobiologiju i zaštitu i unapređenje životne sredine formira se u Zavodu za javno zdravstvo Kantona Sarajevo,
- c) Služba za medicinsku pomoć formira se u JU Opća bolnica "Prim. dr. Abdulah Nakaš" Sarajevo,
- d) Služba za veterinarske poslove (veterinarska služba) formira se u KJP "Veterinarska stanica" d.o.o. Sarajevo,
- e) Služba za zaštitu od požara u šumama formira se u KJP za gospodarenje državnim šumama "Sarajevo šume" d.o.o. Sarajevo,
- f) Služba za vodosnabdijevanje formira se u KJKP "Vodovod i kanalizacija" d.o.o. Sarajevo,
- g) Služba za spašavanje iz lavina, potrage i spašavanje navodi i pod vodom formira se u okviru Gorske službe spašavanja, stanice Sarajevo,
- h) Služba za sječu i uklanjanje oštećenih stabala sa zelenih površina i saobraćajnica formira se u KJKP "Park" d.o.o. Sarajevo,
- i) Služba za smještaj ugroženog i nastradalog stanovništva i snabdijevanje formira se u Crvenom križu Kantona Sarajevo,
- j) Služba za zaštitu, spašavanje iz ruševina i raščišćavanje terena formira se u okviru pravnog lica "Bosman" d.o.o. Sarajevo.


Svjetska zdravstvena organizacija je 11.03.2020. godine službeno proglasila pandemiju, Vijeće ministara BiH je donijelo Odluku o proglašenju stanja prirodne ili druge nesreće na teritoriji Bosne i Hercegovine 17.03.2020. godine, Vlada FBiH je donijela Odluku o proglašenju stanja nesreće zbog koronavirusa na području FBiH 16.03.2020. godine, te je s tim u vezi i Agencija za javne nabavke Bosne i Hercegovine izdala saopštenje broj: 02-02-1-489-1/20 od 17.03.2020. godine kojim se obrazlaže način postupanja ugovornih organa u provođenju postupaka javnih nabavki neophodnih za sprječavanje širenja i ublažavanje posljedica pomenutoga.

S obzirom na novonastalo stanje pandemije ugovorni organ je u obavezi zbog proglašenog stanja prirodne i druge nesreće izvršiti opremanje svojih naprijed navedenih službi. Shodno navedenom ugovorni organ hitno, odnosno u izuzetnoj nuždi postupati u skladu sa članom 10. stav 1. tačka b) Zakona o javnim nabavkama ("Službeni glasnik Bosne i Hercegovine", broj 39/14), u svhu nabavke "čije izvršenje zahtijeva posebne mjere sigurnosti" što u konkretnom slučaju znači nabavku roba u svrhu zaštite javnog interesa (spašavanje ljudskih života, zdravlja i slično), a u skladu sa Zakonom o zaštiti stanovništva od zaraznih bolesti („Službeni glasnik BiH” broj: 29/05) i Okvirnog zakona o zaštiti i spašavanju ljudi i materijalnih dobara u BiH od prirodnih i drugih nesreća („Službeni glasnik BiH” broj: 50/08).



Budući da je Svjetska zdravstvena organizacija WHO proglasila pandemiju koronavirusom (CoVID-19), u cilju poduzimanja najviših mjera zaštite stanovništva i na način sprječavanja, zaraze koronavirusom, neophodno je izvršiti hitnu nabavku zaštitnih maski za jednokratnu upotrebu u količini 50.000 komada. Takođe, u svrhu postupanja u skladu sa mjerama Kriznog štaba Ministarstva zdravstva Kantona Sarajevo i naredbama Federalnog štaba civilne zaštite, s obzirom na nastalu situaciju hitnosti u prevenciji i zaštiti svojih zaposlenika (namještenika, državnih službenika i pripadnika vatrogasne brigade), kao i uposlenika navednih službi a istovremeno i u cilju adekvatnog obavljanja poslova zaštite od požara i poduzimanja mjera zaštite i spašavanja, te zbog potrebe hitnosti za reakcijom u svrhu prevencije i zaštite, ugovorni organ pokreće predmetnu nabavku.

Primjena postupka javne nabavke, odnosno vrijeme potrebno za provođenje istih, prouzrokovalo bi izuzetno negativne posljedice (zaposlenike Kantonalne uprave civilne zaštite Kantona Sarajevo izložilo maksimalnom riziku zaraze zbog prirode radnih zadataka i stalnog kontakta sa građanima). Ugovorni organ je na temelju ove procjene postupio i preduzeo radnje odmah.



**Dostavljeno:**

- Naslovu
- a/a

